



## 佢就在這位等你

你問佢在哪位等你？佢就在這位等你！自你離開這位，就無再過轉來。共下搞樹乳仔、打紙牌仔个禾埕，成時，還會有一兩隻月鴿仔，在這位行去行轉，毋知係失忒方向、尋無路轉，抑係飛瘰地，到這位歇暍、停跔。過無幾久，乜毋知過忒幾久，該月鴿仔連影就看毋著，毋知係飛走地，抑係分人捉走，空羅羅仔个禾埕，就伸著該頭牛眼樹做伴。牛眼打花个時節，還看得著無閒彳亍个糖蜂仔；牛眼結子个時節，還有看著兩條膨尾鼠在樹頂高，跳上跳下，巡啊巡仔。

你問佢在哪位等你？佢就在這位等你！還記得共下行過个莊心路，偲佢識共下走相逐，比麼人走較遽，講好先走到阿京伯雜貨店个人就贏！整車仔个阿增伯屋脣，壞忒个輪仔，偲佢也長透同佢拿來搞，輪仔緊輪緊遽、緊輪緊遽，成擺仔來毋掣當，還會連輪帶人撞著壁。阿京伯店面前，銅甕仔一踢，大家走到飛輕，黏時四散到逐條細巷仔肚，屎缸背、樵堆後、大門背，一哪仔就因，一哪仔就尋。

你問佢在哪位等你？佢就在這位等你！阿樣伯公个煙筒頭，變鬼作怪个細鬼仔，麼人毋識分佢敲過？衰過做到疍背个阿富伯姆，逐日揸等菜籃、錫桶个身影，既經消失，聽講佢已經去到天頂做仙；田地多到死鳥仔就飛毋過个阿豬嫲，偷摘厥牛眼、杌仔、蓮霧个偲佢，係講分佢睨著，黏時對樹頂高跳下來，遽遽擢忒身項个東西，落笊仔瀉，驚怕分佢抓著就死無命！還有，還有嫁分外省軍人个阿緞妹、莊項有名个鐵算盤、廟項神明生掙手个善男信女、做子弟班个恁多叔公阿伯……

你問佢在哪位等你？佢就在這位等你！流過莊肚个圳溝脣，識留下叔婆伯姆洗洗盪盪个身影，當久無用个洗衫枋，毋知分人搬到哪位去哩。圳溝肚覓過个蜆仔、捉過个黃鱔、釣過个土鯽仔，乜毋知瀉到哪位去地？偲佢放過个紙船仔，早就毋知跔等水流湜(gong)到哪位去咧！

你問佢在哪位等你？佢一直、一直就在這位等你！佢一直在這位生活、恁想、懷念。故鄉个風景在該變，當多人也離開這位咧，毋過，佢一直在這位，等等哪日你會倒轉來。

作者：邱一帆

### ☆詞彙學習☆

【這位】ia` vi：指這裡。

【月鴿仔】ngied gab` e`：賽鴿。

【空羅羅仔】kung` lo` lo` e`：空蕩蕩的。

【整車仔】zang` ca` e`：修車。

【銅甕仔】tung` gong` e`：鐵鋁罐。

【來毋掣當】loi` m` cad` dong：來不及剎車、阻止。

【走到飛輕】zeu` do bi` kin`：一溜煙、跑得飛快。

【一哪仔】id` nai` e`：到處。

【衰過】coi` go：可憐。

【落笊仔瀉】lag fang` e` xia：落荒而逃。

【鐵算盤】tied` son pan`：比喻過於精算、吝嗇的人。

【土鯽仔】tu` jid` e`：本土種鯽魚。